

Drage džematlije!

Allah Uzvišeni je dao nekima strpljenje kao ključ uspjeha na ovom prolaznom dunjaluku. Sabur je podnošenje životnih neprijatnosti i neugodnosti, i nepadanje u strah i nemir prilikom nesreća i nezgoda. Sabur je narav i moral Vjerovjesnika i Poslanika, sallallahu alejhi ve sellem.

Uzvišeni se obraćao Muhammedu, a.s.: **"Ti izdrži kao što su izdržali odlučni poslanici."** (El-Ahkaf, 35.)

Allahov Poslanik Muhammed, sallallahu alejhi ve sellem, kaže: **"Nikome nije dat obilniji i bolji poklon od onoga kome je darovan sabur."** (Bilježi Imam Malik)

**Vrste sabura:**

**- Sabur u pokornosti**

To je ustrajnost čovjeka u činjenju dobrih djela i izvršavanju ibadeta (vjerskih obaveza), i strpljivosti u tome. Radi toga je Allahov Poslanik, a.s., rekao: **"Džennet je okružen neugodnostima, a vatra je okružena strastima (uživanjima)."** (Muslim)

U drugom hadisu se kaže: **"Mudžahid je onaj ko se bori protiv sebe (svojih strasti) u ime Allaha."** (Ahmed)

Ova vrsta sabura zahtijeva ispravan nijjet, ihlas - iskrenost Allahu i isključenje licemjerstva.

**- Sabur u iskušenju**

To je strpljivo podnošenje svega onoga što je Uzvišeni Allah odredio i propisao čovjeku.

Uzvišeni kaže: **"... oni koji su strpljivi i izdržljivi u neimaštini, i u bolesti, i u boju ljutom. Oni su iskreni vjernici, i oni se Allaha boje i ružnih postupaka klone."** (El-Bekare, 177.)

Ovakav sabur treba da se primijeni kod "prvog udara", na početku teškoće koja nas je zadesila. Enes ibn Malik, r.a., priča: *Prošao je Allahov Poslanik, sallallahu alejhi ve sellem, pored neke žene koja je plakala kod mezara, pa joj je rekao: 'Boj se Allaha i strpi se.' Ona mu je odgovorila: 'Ostavi me, tebe nije zadesilo ono što je zadesilo mene,' ne znajući kome se obraća, pa kada joj je rečeno da je to bio Allahov Poslanik, sallallahu alejhi ve sellem, otišla je do njegove kuće, ne našavši na vratima nikakve čuvare, pa mu rekla: 'Nisam te poznala.' - a on je dodao: 'Strpiti se treba kod prvog udara.'* (Buhari)

Poslanik, a.s., je, također, govorio: **"Kojeg god roba zadesi musibet - nesreća pa kaže: 'Mi smo Allahovi i Njemu ćemo se vratiti. Gospodaru moj, nagradi me za moj musibet i zamijeni mi ga dobrom, Allah će ga nagraditi za njegov musibet i nadomjestiti ga nečim što je bolje.'" (Ahmed)**

**- Sabur u međuljudskim odnosima**

To je strpljivo podnošenje ljudskih uvreda i njihovih ružnih postupaka. Allahov Poslanik, sallallahu

alejhi ve sellem, kaže: **"Vjernik koji se druži sa ljudima i strpljivo podnosi njihove uvrede ima veću nagradu od vjernika koji se ne druži s njima i ne podnosi njihove uvrede i neprijatnosti."** (Ahmed)

#### **- Sabur u da'vetu - širenju islamskog poziva**

To je strpljivo podnošenje svih neprijatnosti i poteškoća na putu širenja islamskog poziva. Allahov Poslanik, sallallahu alejhi ve sellem, i ashabi, radijallahu anhum, su pokazali divan primjer u podnošenju uvreda i neprijatnosti Kurejšija, a potom i medinskih židova, na putu širenja islama. Poslanik, sallallahu alejhi ve sellem, je strpljivo podnosio uvrede i napade, istovremeno ustrajavajući u svojoj misiji i bodreći svoje drugove na strpljivost.

Habbab ibn Erett, radijallahu anhu, priča: **"Požalili smo se Allahovom Poslaniku, sallallahu alejhi ve sellem, dok se odmarao u hladovini Ka'be, naslonjen na svoj ogrtač, pa smo mu rekli: 'Zar nam nećeš pomoć zatražiti, zar se nećeš Allahu, subhanehu ve te'ala, za nas obratiti?' On je na to odgovorio: 'Događalo se u narodima prije vas da čovjeku iskopaju rupu u zemlji, zatim ga stave u nju, zatim donesu testeru pa je stave na njegovu glavu i raspolove ga na dvoje, i opet ga to ne odvraća od njegove vjere. Pročešljaju ga željeznim češljevim, odvajajući mu meso od kostiju ili živaca, pa ga to opet ne odvraća od njegove vjere. Tako mi Allaha, ova stvar (Allahova vjera) će se upotrijebiti do te mjere da će putnik, jahač putovati od San'e do Hadramevta ne plašeći se nikoga osim Allaha i vukova za svoje stado, međutim vi ste nestrpljivi.'" (Buhari)**

**'Najvećih su iskušenja vjerovjesnici, zatim oni koji slijede, zatim oni koji slijede, zatim oni koji slijede.'**" (Ahmed)

U Kur'anu, Allah Uzvišeni nam spominje da su na gubitku oni koji nisu strpljivi, stoga, drage džematlije, budimo, ili trudimo se što više biti saburli insani. Popravimo svoje stanje u pokornosti prema Uzvišenom Stvoritelju. Popravimo svoje stanje prema iskušenjima! To je test koji se stavlja pred nas da ispita naše ponašanje kad smo u blagostanju i kad nas nevolje zadese. Popravimo svoje stanje prema drugima! Popravimo svoje stanje u širenju islama. I budimo zadovoljni i zahvalni Allahovi robovi u svakom stanju.

Allaha, dž.š., molimo za Njegovu milost, spas i oprost od grijeha. Allaha, dž.š., molimo da nam pomogne da ne posustanemo u teškoćama, sačuva nas šejtanskih spletki i došaptavanja i da nam poveća sabur u nama!

Amin!

Hamza-ef. Terzić, Jönköping, 2.11.2018.